



06.10.2021

UKA2021/159

Kalaallit Nunaata MARPOL-imut isumaqatigiisummi ilanngussaq VI-mut atatillugu nunap immikkoortuatut tunuarsimaarfigineqarneranik Namminersorlutik Oqartussat atorunnaarsitsinissaat pillugu Inatsisartut aalajangiiffigisassaattut siunnersuut. (Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Siumumit saqqummiunneqartoq imaattumik oqaaseqarfigissavarput.

Siumumit pingaartittuarlugu oqaatigiuartarparput avatangiisitsinnut pingaartitsineq. Nunaq manna inuuffigisarput siulitsinni atugarigatsigu erligalugu paarisassaraarput. Kingulissattalu inuuffigisassatut atoqqittussaammassuk ajunnginnerpaamik illersorneqarnissaanik Siumumit suleqataalluassaagut. Kalaallit nunarpummi nunarsuarmi qeqertat minguinnerpaatut inissisimasoq silarsuarmioqatitsinni qitiusutut inissikkiartornera Siumumit malinnaasuusugut ilisimaarilluinnarparput. Taamaammat Siumumit inuuffigisatta avatangiisia kusanangaartoq, imartarpullu illersornissaa tamakkiisumik tapersersorlugu peqataaffigissuarput.

Uani pineqarpoq Silaannarmut angallatit angisuut ikummatissamik HFO kinertumik atuinerikkut silaannarmut mingutsitsinerisa killilersimaarnissaannik nunarsuarmioqatitta eqqummaariffigilluagaannik peqataalernissamik Naalakkersuisut saqqummiussinermikkut oqaatigivaat.

Angallatimmi uuliami kinertumik atuinerikkut silaannarmut mingutsitsisinnanera inummut napparsimalertitsisinnanera navianartutut, kiisalu imartatta uumasuunik nunamilu naasunik silaannatsinnillu allannguisinnanera pinaveersaassagutsigu massakkut isumaqatigiisummut tamakkiisumik peqataalernissarput Siumumit taperserparput. Nunatsinnimi ajoraluartumik Nappaammik eqqorneqartartut kræftimik ikigisassaangitsut Siumumit ilisimaarilluinnaratsigit. Siumumillu neriuutigilluinnarparput isumaqatigiissutinut peqataalerutta nunatsinni napparsimasartut siunissami ikilinissaannik aqqutissiueqataasinnaajumaassalluta.

Pineqartoq MARPOL-mi isumaqatigiissutini Naalagaaffiit Peqatigiit nunani tamalaani Imartat pillugit suleqatigiiffianni isumaqatigiissutaanikuusoq 1973-mi. Nunarpullu 1997-mi isumaqatigiisummi ilaalernikuulluni. Taamaammat Naalakkersuisut MARPOL-mi isumaqatigiissutini ilanngussaq VI-si Siumumit tamakkiisumik taperserlugu ataatsimiisitaliamut susassaqartumut ingerlateqqipparput.

Mala Høy Kúko, Siumut